



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

7. Kalenderwoche – ab 12. Februar 2011

Kimmorlisch

Es dud immor widdor Sachn gähm, wosch misch frachn du, ob mir nu im Zeidaldor dor Migroelegdrohnig un dor Weldraumfahrd lähm dun odor im Middlaldor! Na, is doch wahr! Beischbielsweise duds bis offn heidischn Daach noch keene Bfefformiehle gähm, die dähn Bfeffor so mahln dud, dassor ooch als Bulvor rauskommd. 99 Brozend allor Bfefformiehl, dies in de Gadschädädn gähm dud, die dun dähn Bfeffor nisch mahln, sondorn innen bloß e bißl durstmischn. Odor - wenn was rauskomm dud, dann sin das so ganz grobe Broggn, wie Schoddor. Odor ooch Bichsneffner un Gorgnziehor... das meisde, wasses so an Haushaldshilfsgeräde gähm dud, is Schrodd! Odor du mussd dir dann was aus Ehdlschdahl mid Nobldesein koofn. Aus Idaljen odor Dähnemarg! Abor währ kann sich das leisdn - fiehr een Gorknziehor mähr bezahln, als wie fiehr e Dudznd Flaschn? Nodfalls dud mor ja eene Flasche ooch ohne Gorgnziehor offgrischn.

Wobei... bezieschlich de Gorgnziehor, da hads wahrscheinlisch doch ma baar schlaue Leide gegähm, die sich daderdrum eene Riebe gemachd ham. Nee, die ham keen neun Gorgnziehor erfundn, die machn de Weinflaschn mid Schraubvorschluss! Da is dor Gorgnziehor vellisch ieborflissisch! Abor sowas Genjales is seldn!

Odor ooch bei Vorbaggung - mansche Vorbaggung grischsde eenfach nisch off. Ich gloobe, es is schon mansche scheene CD ungeheerd im Mill gelanded, weill de Blasdehille nisch offgehn wollde. Warum gibbds keene Vorbaggung mid Reißvorschluss?

Odor gesdorn - da warsch mid meinor Gudstn im Dheador un da hadde isch mir eene Schachdl mid Nisse gekoofd. Die Nisse warn in eenor Babbschachdl un dann inne nochma in Blase eingeschweißd. Denkn Sie, isch hab die Blase offgegrischd? Isch mussde mid de Zähne nachhelfn,

dann is de Blase bledzlich offgerissn un de Nisse lachn alle offm Fußbodn. Wie im Middlaldor!
Un meine Gudste had misch beese angezischd, weilsch misch immor so dähmlisch anschedln däde!
Daderbei konnde isch nisch dafiehr. Dass isch dann nu ooch noch de Nisse offsammln mussde... wo
ischs doch so im Greize hab! un ooch de Gnieje... - Sie gloom nisch, was isch fiehr Wuhd off die
Nissehärschdellor gehabd hab! Die mid ihror bleedn Blase!

Nee, das is doch werglisch gomisch - mansche Sachn sinn derardisch ausgefeld un sowas von
berfeggd heidzudaache... de Hendys un de Gumbjudor un Audos... un ooch wenna in Migro is - es
dud drozdähm alles glabbn wie geschmierd! Un annre Sachn, die doochn eenfach nischd. Die
kannste koofn un wegschmeißn! Odor nimmse de Gullidegg! Off de Schdraßn die. Es dud eenfach
keen Gullidegg! gähm, dähr nisch absaggn dud, wenn de erschdn LKW`s driebor gefahrn sin!

Wie kommd denne das? Warum dud sisch da keenor drum kimmorn?

Es dud doch ieborall Leide gähm, die sich um jedn Scheiß kimmorn dun... abor manschor Scheiß
dud keen kimmorn! Das is doch werglisch sch... werglisch kimmorlich!

Eduard Sachsenmeyer